

# HUMS wujud khidmat teleperubatan pertama di Sabah

[myMetro](#) Rafiqah Dahali

[am@hmetro.com.my](mailto:am@hmetro.com.my)

HOSPITAL Universiti Malaysia Sabah (HUMS) mengambil inisiatif mewujudkan perkhidmatan teleperubatan pertama di Sabah.

Portal Tanya Pakar Perubatan UMS itu adalah sebagai langkah menghadkan pergerakan orang awam keluar dari rumah mendapat khidmat nasihat perubatan sepanjang tempoh Perintah Kawalan Pergerakan Bersyarat (PKPB).

Ketua Seksyen Teknologi Maklumat HUMS, Mohd Nizar Hamild berkata, portal terbabit menyediakan perkhidmatan kepada warga UMS dan orang awam yang ingin mendapatkan nasihat dari pakar perubatan HUMS serta Fakulti Perubatan dan Sains Kesihatan (FPSK) UMS.

"Orang awam tidak perlu ke Pusat Kesihatan Universiti bagi mendapatkan nasihat kesihatan pada peringkat awal sebaliknya dapat berhubung dengan pakar perubatan UMS menerusi sidang video dalam slot Tanya Pakar Perubatan.

"Bagi mengelakkan sebarang masalah berkaitan isu privasi, portal Tanya Pakar menggunakan sistem sidang video persendirian MIRUBA yang direka Jabatan Teknologi Maklumat dan Komunikasi UMS," katanya dalam satu kenyataan hari ini.

Sementara itu, Pengarah Klinikal HUMS, Dr Nicholas Pang berkata, terdapat lima orang membuat telekonsultasi dalam tempoh seminggu selepas pra-pelancaran perkhidmatan berkenaan.

Menurutnya, rata-rata pelanggan memberi maklum balas yang positif terhadap perkhidmatan berkenaan.

Warga UMS dan orang awam yang berhasrat untuk mendapatkan perkhidmatan terbabit boleh membuat temujanji di <http://tanyadoc.ums.edu.my/>.

• [Lagi berita berkaitan perintah kawalan pergerakan](#)

Artikel ini disiarkan pada : Khamis, 21 Mei 2020 @ 4:48 PM